


GO BE GO SE BJALO

GO TLOGA MATHOMONG

 . . .gore letšatši le lengwe, ge re ka feta ka godimo ga legoro le la molapo wa tsebo ya lehu, gomme ra swanela go ya ka go lefelo lela la leswiswi le bitšwago lehu, ge A etla gomme A bitša, re tla tšwa magareng ga bona ba ba hwilego, ka gore re Mo tseba ka maatleng a tsogo ya Gagwe. Gomme re thabetše seo kudu.

² Gomme re ne kgahlego kudu, Morena, ka go ba bangwe go tseba Tsela yeo. Ke ka baka leo re kgobokanego bošegong bjo, gore ba bangwe ba ke ba tsebe, yela, khutšo ye e phethagetšego ye, khutšo ye yeo e fetago tlišaologanyo, yeo e re fago kholofelo yela ye kgolo.

³ Bjale, O bone diatla tše di ilego godimo, Morena, gomme Wena o Modimo yo a tsebago sephiri sa pelo ye nngwe le ye nngwe, o tseba kgopelo, gomme re kgopela Wena, Tate wa rena, gore O tla gopola yo mongwe le yo mongwe wa bale, gomme a nke dikgopelo tša bona di fiwe, Morena.

⁴ Morena, fodiša balwetši, dira difofu go bona, le difoa go kwa, dihlotša go sepela, gomme a nke go se be le motho wa sekoka magareng ga rena ge tirelo ye e tswalela bošegong bjo. A nke khote ye nngwe le ye nngwe e se be le selo, setulo se sengwe le se sengwe sa bagolofadi se se be le selo, monna goba mosadi yo mongwe le yo mongwe yoo a nago pelo ye mpe, e tabogago merethetho, a nke e rethethe sekeng ka go phethagala, bolwetši bjohle bo nyamaletše, sebe sohle se ile.

⁵ Gomme a nke re tloge fa bošegong bjo, re ye pele ka tsela ya rena boka bale ba bego ba etšwa Emause ka matšatšing a a fetilego, hlatse ya mathomo ya tsogo ya Gagwe, re bolela mantšu a go swana, “A dipelo tša rena ga se tša swa ka gare ga rena, ge A be a bolela le rena tseleng?” Ka gore re a e kgopela, Leineng la Yena Yo a re lopolotšego, Morwa wa Gago, Morena Jesu. Amene. [Ga go selo go theipi—Mor.]

⁶ Feela makgwakgwa gannyane nthatana, ke be ke rera mosong wo go ye nngwe ya dikereke fa, ya Ngwanešu Fuller, gomme re bile le nako ye kgolo tlase kua mosong wo ka go Morena, gomme ke no šegofala, gomme ke no se tsebe ke eme neng. Gomme re leboga Ebangedi ya fešene ya kgale ye e sego ya ke ya lahlegelwa ke maatla a yona, gomme e ka se tsogego ya lahlegelwa ke maatla a yona.

⁷ Bjale, bošegong bjo, re file gape, bakeng sa tirelo ya phodišo bošegong bjo, goba thapelo bakeng sa balwetši. Ga re tsoge ra

nyaka go hlakanya seo, re ka kgona go rapelela balwetši, eupša tirelo ya phodišo e tšea Modimo go e dira.

⁸ Bjale, elelwang, phodišo ke se sengwe seo se fetilego, phološo ke se sengwe seo se fetilego. Selo sa pele go go dira o lemoge woo ke Moya wo Mokgethwa wa Modimo, Modimo o swanetše go e utolla go wena, e ka se tsoge ya ba kgonthe go fihla Modimo a e utolla go wena. “Ga go motho a ka tlogo go Nna, ntle le ge Tate wa Ka a mo goga pele. Bohle ba Tate a Mphilego, ba tla tla go Nna.” Ke lena bao. Kafao, a monyetla o lego ge modiradibe e ka ba mang a ekwa kgwatho ye nnyane yela pelong ya bona! A monyetla wa ge Modimo a efa pitšo go selo se segologolo seo se ka diregago go wena, go ba le Bophelo bjo Bosafelego!

⁹ Bjale, gosasa bošego ke bošego bja rena go thiša. Ba ya go lwa ka ntikodikong ye fa, mohuta wa go fapana wa ntwa, re lwa le lenaba, Sathane, eupša banna ba ya go katana, goba go lwa ka matswele, goba se sengwe, mo gosasa bošego. Gomme go re fa sebaka go hwetša feela go khutša ga bošego.

¹⁰ Gomme morago re ya go kgabola beke ye e latelago ka moka, go ya pele go fihla Lamorena le le latelago bošego, Morena ge a rata. Ka gona re tla hlaganela go tloga mo go ya—go ya Oklahoma, go thoma ka Tulsa, e ka ba, ke na le e ka ba matšatši a mane a go khutša, ke a nagana, gomme morago ke thoma ka Tulsa. Gomme ka gona, ge Morena a rata, go tloga fao re ka no ya, re beakanya, thwi morago ga go tloga fa, re tseleng ya rena go ya mošwamawatlle, Morena ge a rata, bakeng sa leeto la go felela la Yuropa. Gomme kafao, re hlologela dithapelo tša lena. Tirišano ya lena ye kaone ka dikopanong tše e bile ya go kgahliša.

¹¹ Labobedi mosong, ga se ke kgone go tšea lefelo la monna yo, eupša ke ya go leka go dira, Ngwanešu David du Plessis, modirišani le mogwera wa ka wa hlogo ya kgomo, yo mongwe wa barutiši ba go ikgetha ba letšatši le. Gomme nna... Modimo o mo fa bodiredi bjoo bo itlhaotšego, go tliša dikereke mmogo ka kopanelong. Seo ga se re feela Full Gospel, tšeo ke dikereke *tšohle*, badumedi bohle, Methodist, Presbyterian, Baptist. Gomme makga a mantši ge re ka... [Ga go selo go theipi—Mor.]

¹² ...Ka mehla ke pharilwe molato wa—wa go bolela dilo kgahlanong le dikereke. Gomme elelwang, ge ke dira seo, ga ke re ka tsela yeo. Ke—ke ra gore ke itia sebe seo se dumeletšwego go šoma ka kerekeng. Ga ke re kereke, ga go dikerekemaina, ke a di rata, ye nngwe le ye nngwe, gobane ka go kerekeleina ye nngwe le ye nngwe Modimo o ne bana. Le a bona? Ba ka go dikerekemaina tšohle.

¹³ Yeo ke pono ye kgolo ya Ngwanešu David. Gomme o šegofaditšwe ke Morena go bolela ka Harvard le tše ntši tša diyunibesithi tše kgolo mo ka dinageng, le mafelo a go fapana. Gomme Modimo o mo file kgaogelo magareng ga dikereke tšohle

tša go fapana. O be a bolela godimo ka Eleventh le Garfield, mo mosong. O swanetše go fofa bjale go ya Indianapolis, Indiana, go ba le batho ba Methodist kua, morago o bowa morago Labobedi, nako ye nngwe. Gomme O . . .

¹⁴ Ke swanetše go tšea lefelo la gagwe, goba go leka go dira, Labobedi mosong, go bolela le badiredi, mo ke ratago go dira seo, le go ba le kopanelo le badiredi le bagatša ba bona, le go ya pele, ka Labobedi mosong. Ke nagana tirelo e tla thoma ka masometharo a ya lesome le ngwanaborena yo bohlokwa fa, ke sa tšwa go ithuta go rata kudu letšatši le lengwe le le lengwe, Ngwanešu Shores wa rena. Gomme kafao re swanetše go ba kua Labobedi mosong.

¹⁵ Gomme Ngwanešu Borders, ke a thanka, o tla šala fa le rena, le Leo le Gene, le bašomi ka moka. Gomme Ngwanešu David o tla bowa bakeng sa Laboraro mosong go tšea lefelo la gagwe gape.

¹⁶ Bjale, ke a tshepa gore Morena o tla re fa tumelo ye e dudišegilego bošegong bjo. Ke a tshepa gore bjo e tla ba bošego bjo selo se segolo sela re se lebeletšego pele, ke dirile, nnamong, lebaka la mengwaga ye mebedi goba ye meraro ya go feta go phuleletša thwi ka gare go kopano ye fa bošegong bjo ka Phoenix. Oo, a nke Modimo ka kgaogelo ya Gagwe a lebelele fase godimo ga rena. Ke rata bjang go re e thomile ka Phoenix! Bošego bjo bongwe beke ye e latelago, Morena ge a rata, ke tla le fa se ke se tsebago ka yona, ge Morena a rata, ka se sengwe ke dumelago ke . . . Ga se nke . . . Gabotse, re tla no leta.

¹⁷ Bjale re rata go bala le lengwe la Lengwalo fa bošegong bjo, gobane ga ke nagane gore tirelo e ka ba efe e feletše ntle le go bala Lengwalo. Go boneng sehlopha se sa batho fa bošegong bjo, pele re e dira, ke a tseba gore ba bangwe, yo mongwe o ntšhitše dikereke tša bona bakeng sa tirelo ye. Morena a go šegofatše, ngwanešu wa ka, le tirišano ya lena ye kaone. Modimo a be le lena.

¹⁸ Gomme bjale re rata go bala bošegong bjo go tšwa go Puku ya Ebangedi ya Mokgethwa Mateo, gomme ke nyaka go bala mohlomongwe ditemana di se kae ka fa. Gomme a re thomeng go bala go, a re nong go bala temana ya 8 ya tema ya 19:

Gomme O rile go bona, Moshe ka baka la bothata bja dipelo tša lena o le dumeletše go lahla bagatša ba lena: eupša go tloga mathomong go be go se bjalo.

¹⁹ Bjale, ga re ye go bolela ka *Lenyalo Le Tlhalo*, eupša ke ya go tšea mantšu ale a sego makae a mafelelo ka fale bakeng sa sehlogo: *Go Be Go Se Bjalo Go Tloga Mathomong*.

²⁰ Ge Jesu a tlile lefaseng go aga le batho, gomme ge Yena, mengwaga ya mathomo ye masometharo ya bophelo bja Gagwe e bile, ga re ne rekoto ye ntši ya yona. Eupša ge A thoma go ya ntle magareng ga batho, O hweditše dilo tša go tlabo kudu di

kgatlampana. Gomme O hweditše barutiši ba letšatši lela ba ruta dilo tšeo di bego di no se be gabotse tlwa.

²¹ Gomme ke a makala, ge A etla lehono, ge re be re ka se be mohuta wa nthatana gannyane ka tsela ya go swana; ke tšea rena bohle mmogo, kereke ka moka tšekelele. Gore ge re be re ka se ke . . . O be a ka se bolele boka A dirile ka letšatsing lela, “Go be go se bjalo go tloga mathomong.”

²² Bjale, ge le ka hlokomela, O šupile morago mathomong. Gomme kagona, ge re nyaka go tseba se e lego therešo, se dilo tša therešo di lego sona, re tla swanela go ya morago mathomong.

²³ Bjale, Modimo ke mohlokamagomo, bohle re tseba seo, gore A ka se kgone go fetoga. Fao ke mo tumelo ya rena e ka khutšago e netefaleditšwe kudu. Ge Modimo a bolela e ka ba eng, e swanetše go ba ka tsela yeo go ya go ile, e ka se tsoge ya fetoga.

²⁴ Bjale, Modimo ke mokgonatšohle, motlalogohle, ka go ba motsebatšohle go Mo dira motlalogohle, O tseba dilo tšohle. Eupša Modimo a ka se kgone go no ba bjalo ka ge moya o le, ka baka la gore Modimo o na le lefelo la bodulo. Modimo ga se nonwane, Modimo ke Sephedi, Modimo, Jesu. Yena, Modimo, lešalašala, Yena ke Sephedi, kagona Yena ke motsebatšohle, motlalogohle, mokgonatšohle, le mohlokamagomo.

²⁵ Bjale, go ba mohlokamagomo, le tšwa go lentšu go *hlokamagomo*, leo, “ga go magomo.” Yena ke wa Gosafelego. Gosafelego go bjalo ka ntikodiko, go ya go dikologa, go dikologa, gomme o leka go hwetša mo go thomilego goba mo go felelago, ga go mathomo goba bofelo go bjona.

²⁶ Modimo o bjalo ka taamane ye kgolo ye e dutšego ka mokgwa *wo*. Gomme dimpho tša Moya ke ponagatšo ya Taamane ye, tše di bonagatšago mahlasedi a Seetša go tšwa go Taamane ye kgolo ye. Boka dimpho tše senyane tša semoya ka Kerekeng, di bjalo ka mahlasedi a senyane ao Moya wo Mokgethwa o a bonagatšago ka Kerekeng. A Seetša go sepela ka go sona, go tšwa go Taamane e tee ye kgolo, Modimo!

²⁷ Gomme Modimo, ka go ba mohlokamagomo, O tsebile dilo tšohle pele lefase le ka tsoge la hlolwa. O tsebile ntšhi ye nngwe le ye nngwe, tšhošwane ye nngwe le ye nngwe, nako le nako ge e be e tla ponya leihlo la gagwe, ke makhura a makae a bilego le wona, pele lefase le ka tsoge la thoma, seo ke go hlokamagomo. O tsebile bofelo go tloga mathomong, kafao seo se Mo dira mohlokamagomo. O a tseba (Kafao gona Yena ke motlalogohle ka go tseba dilo tšohle.), se se diregago.

²⁸ Bjale, e ka ba eng A e bolelago, ke therešo go ya go ile. Ge Modimo a kile a biletšwa lefelongtiragalo go dira sephetho, gomme A dira sephetho seo, se swanetše go ba ka tsela ya go swana go ya go ile, A ka se kgone go fetola sephetho seo. Gobane ge A re, “Gabotse, Ke—Ke naganne seo nako yeo, eupša Ke tseba

bokaonana bjale.” Gabotse, ge yeo e le taba, gona Yena ga se Modimo.

²⁹ Bjale, nka re, “Ngwaga wo ke dumela selo se rilego,” gomme gosasa nka bowa morago, ka re, “Aowa, ke be ke le phošo,” gobane ke ne magomo, o a swana, eupša e sego Modimo, sephetho sa Gagwe ka mehla se phethagetše. Bjale, ge Modimo a dirile setatamante, gomme—gomme a file badiradibe tsela ya go phonyokga, gomme a e theile godimo ga tumelo go dumela, modiradibe wa go latela o tla go Modimo, Modimo o swanetše go mo lemoga feela boka A dirile wa pele.

³⁰ Gomme ge Modimo a theile phodišo Kgethwa godimo ga tumelo ka go Madi a tšholotšwego a Morena Jesu, gomme motho wa mathomo o tlile a amogela phodišo, boka monna mo kgorong, ye e bitšwago ye Botse, ka tumelo Leineng la Jesu, motho yo a latelago godimo ga motheo wo o swanago, o tla amogela selo se se swanago.

³¹ Ge Modimo a tšholletše Moya wo Mokgethwa godimo ga batho ka Pentecost, gomme seo e bile sephetho sa Gagwe, gore ke ka fao Kereke e swanetšego go šoma ka tlase ga maatla a Moya wo Mokgethwa, A ka se kgone go fetola seo. A ka se kgone go se phetholela godimo gomme a re, “Gabotse, Ke tla o fa pišopo, Nka kgona go o fa *yo*, goba Ke tla o fa *yola*.” O swanetše go šala le sephetho sela sa go swana. Gomme ge Kereke ka Letšatši la Pentecost e amogetše kolobetšo ya Moya wo Mokgethwa, gomme phe—phe phetogo ye e tšwago go kolobetšo yela ya Moya wo Mokgethwa e tla ba phetogo go motho yo mongwe le yo mongwe yoo a kilego a amogela kolobetšo ya Moya wo Mokgethwa.

³² Sehlare, sehlare, ge se filwe bjalo ka se itšego, e sego. . . Tlhabelo ya Salk, goba e ka ba eng e ka bago, ge e swanetše go šoma, gomme ya šoma go motho yo a itšego, go ba dira ba dire ka tsela ye e itšego, motho wa go latela yo e mo swarago, o tla swanela go dira ka tsela ya go swana bakeng sa tlhabelo. Ke ka tsela ye go lego ka Moya wo Mokgethwa, le Modimo. Mantšu a Gagwe a phethagetše, Yena ke mohlokamagomo. Bjale, ge Modimo a re go swanetše go ba ka tsela ye. . .

³³ Bjale, ka Letšatši la Pentecost, Petro o be a bolela, gomme batho ba be, ba be ba bolela ka maleme, gomme ba dira lešata, le—le go bolela ka maleme a mangwe, ba itshwara boka ba be ba le banna ba go tagwa. Gomme ba ile ba botšišwa ka dilo tše, gomme ba nyaka go tseba ka fao ba ka phološwago. Gomme Petro o ba boditše go sokologa le go kolobetšwa, yo mongwe le yo mongwe wa bona, Leineng la Jesu Kriste, bakeng sa go tlošwa ga dibe tša bona, “gomme le tla amogela neo ya Moya wo Mokgethwa, ka gore tshepišo ke ya lena, le go bana ba lena, le go bona ba ba lego kgole, le ba bantši ba Morena Modimo wa rena a tlogo go ba bitša. Tshepišo ke ya mang kapa mang a ratago, a

a tle.” Kafao, le a bona, Modimo a ka se kgone go fetola seo, ge leo e le Lentšu la Modimo, Le phethagetše go ya go ile.

³⁴ Bjale, re hwetša, gore ge mabaka a eya pele, banna ba tla ka gare gomme ba fapoša Lentšu lela la Modimo go Le dira le swanele motlwae wo o itšego. Bjale ba tla tla go dikologa gomme ba re, “Ga go sa na tlhokego ya go amogela Moya wo Mokgethwa, e no ba wena o etla ka kopanelong ya rena.”

³⁵ Bjale, ge nkabe e bile kopanelo, Moya wo Mokgethwa o ka be o se wa swanela go tla.

³⁶ Bjale ba bangwe ba bona ba rile, “Ge re boloka melao, seo ke sohle re swanetšego go se dira.”

³⁷ Ge go boloka melao e be e le sohle Modimo a se nyakilego, Jesu o hwetše lefeela, Moya wo Mokgethwa o be o se wa swanela go tla, gobane ba bile le melao pele Moya wo Mokgethwa o etla. Eupša go tšea Moya wo Mokgethwa go boloka melao, o swanetše go ba le Wona.

³⁸ Lentšu la Modimo ka mehla le phethagetše, gomme ka mehla le a swana, nako le nako. Bjale, banna ba a Le fapoša le go Le fetola. Gomme ge Jesu a etla lekga la mathomo, O hweditše banna ba ba bego ba dira sona selo se sa go swana, ba fapoša ditsela tša Modimo. Gomme Jesu o rile go bona, “Le Nthapela ka lefeela. Le Nthapela ka lefeela, le ruta bakeng sa Thuto taelo ya batho.” Bjale, eng kapa eng e lego ya lefeela, gabotse, ga se selo go yona, ga se ya loka.

³⁹ Ge nka sepela go theoga mokgotha go topa pili ya tolara, gomme go se na pili ya tolara fao, gona ke sepeletše tlase kua ka lefeela, ke ka lefeela.

⁴⁰ Gomme Jesu o boditše barapedi bale ba letšatši lela, gore ba be ba Mo rapela ka lefeela, “ba ruta Thuto ditaello tša batho.”

⁴¹ Ke leka go reng? O swanetše go ya morago go Lentšu la Modimo go boela morago, o swanetše go ya morago. Kereke e ka se tsoge ya kgona go sepelela pele bokgole bjo bo itšego, go fihla e fihla go Lentšu gomme ya sepela ka Lentšu. Re swanetše go tla go Lentšu. Ga go kgathale se maikutlo a lego, se a bogegago boka, kereke ke ye kgolo gakaakang, batho ke ba maatla gakaakang, o swanetše go tla morago go Lentšu la Modimo. Leo ke Lentšu la Modimo la Gosafelego, gomme re swanetše go tla go Lona.

⁴² Gomme Jesu o rile ka go wona matšatši ge A etla, O bone batho ba lebeletše go kereke bakeng sa phološo. Bjale, batho ba bantši kudu ba dira seo lehono, ba re, “Gabotse, ke nna wa kereke. Ke nna wa kereke *ye*.” Gomme ba lebeletše go yona bakeng sa phološo. Ba hweditše eng, Jesu o ba hweditše ba rapela eng? E sego Lentšu la Modimo, eupša motlwae, thutotumelo; gomme ge A ka tla lehono, O be a tla hwetša bontši bja rena ka go selo sa go swana, re tšea dithutotumelo.

43 Bjale, ge Jesu a be a ka tla lehono, gomme o be o tla re, “Oo, Morena, kereke ya ka, selo sa pele re se dirago, re tsopola thutotumelo ya baapostola.”

44 Jesu o be a tla re, “Go be go se bjalo go tloga mathomong.”
“Kereke ya rena ga e dumele go phodišo Kgethwa.”

45 Jesu o be a tla re, “Go be go se bjalo go tloga mathomong.”
Le a bona? E no ya morago mathomong.

“Kereke ya rena ga e dumele go kolobetšo ya Moya wo Mokgethwa.”

Jesu o be a tla re, “Go be go se bjalo go tloga mathomong.”

46 O swanetše go ya morago mathomong, go ya morago mo e thomilego. Kagona, Jesu o rile, “Le tšea melao ya Modimo gomme la e dira ya go tswapoga ka motlwae wa lena.”

47 Le tšea kereke, melao, thuto ya Beibele, gomme la e hlalošetša thoko yohle, gomme kagona le dira melao ya Modimo go tswapoga. Le tšea Lentšu la Modimo, gomme la Le hlalošetša lohle thoko go ya ka go mohuta wo o itšego wa thutotumelo, gomme morago le a goelela, “O kae Modimo wa Beibele?”

48 Le Mo hlalošeditše thoko. Le e tlošitše yohle go batho, ge le ba botša gore “Matšatši a mehlolo a fetile. Ga go selo se sebjalo bjalo ka Moya wo Mokgethwa. Ga go selo se sebjalo bjalo ka phodišo Kgethwa. Ga go selo se sebjalo bjalo ka ketelo ya Barongwa. Ga go selo se sebjalo bjalo ka mehlolo.” Ge le dira seo, le hlaloša tšohle tša kagodimogatlhago kgole le Beibele, le ntšha Modimo thwi go tšwa kerekeng ge le e dira, ka motlwae.

49 Bjale, ke nagana gore, go nna, ke nyaka go rapela, gomme go rapela le kereke ye e dumelago Ebangedi ya go tlala, gomme e rera Lentšu le lengwe le le lengwe la yona, le go dira Lentšu le lengwe le le lengwe la yona. Eyang morago go Ebangedi ya go tlala, morago go maatla a Modimo, morago go Moya wo Mokgethwa, eyang morago mathomong, gomme le o amogele boka ba dirile mo mathomong, gomme o tla tšweletša dipelo tša go swana o di dirilego mo mathomong, ge le ka no ya morago mathomong go o topa.

50 Oo, lehono go a nkgopotša, ba bantši ba nyama kudu ka go leka go hwetša mafelo a magologolo, le diokene tše botse tša phaephe, gomme dilo tšeo di lokile. Ge kereke e na le sefapano sa gauta sa ditolaro tše milione ka godimo ga yona, e na le okene ya gauta ya ditolaro tše milione, gomme ka kerekeng yeo Moya wo Mokgethwa o na le tokelo ya tsela, tumišang Modimo, ke tla rata go ba wa kereke yeo. Nnete.

51 Eupša ga ke kgathale se e nago le sona, ge Moya wo Mokgethwa o se gona, ga se lefelo la ka. Ke nyaka go ba moo ba O rerago boka O wele mathomong. Ke moo ke tsebago gore ba O hweditše, mo mathomong, seo ke selo se nnoši ke tsebago ka sona, tsela ye ba O hweditšego mo mathomong.

52 Ke ka lebaka leo bošegong bjo, gore ke fa ka Phoenix, lebaka leo lešaba le le kgobokanego ntle fa, ke ka gobane re O dumela boka ba bile le Wona mo mathomong.

53 Modimo ke mohlokamagomo, A ka se kgone go fetoga. Motho o a fetoga, nako e a fetoga, dikgoši di a fetoga, lefase le a fetoga, dikereke di a fetoga, eupša Kriste o dula a swana maabane, lehono, le go ya go ile, gomme a ka se tsoge a fetoga. O no ba boka A bile kua mathomong. Oo, mo . . .

54 O re, “Gabotse, kereke ya rena e bile gona lebaka la mengwaga, le mengwaga, le mengwaga, le mengwaga.”

55 Seo ke se sebotse, seo se laetša gore e swareletše, eupša, ngwanešu, ge ba se ne maatla a Modimo, ba rera Ebangedi ya go tlala, go be go se bjalo go tloga mathomong.

56 Ke na le mosetsana yo motee yo monnyane o dutše mo o ntebeletše, Sarah yo monnyane, gomme ke na le mosetsana yo mongwe yo monnyane gae, Rebekah. Rebekah ka nnete ke mosetsana wa bogolo bjo bobotse bjale, o tla, a ka ba mengwaga ye lesomenne bogolo . . . ? . . . Sarah o no ba e ka ba seswai; gomme bobedi ke basetsana ba bannyane ba Papa. Gomme kafao, ge ke eya ntle kopanong, le go thoma, go tla gae, ka mehla ba dula ba phafogile go ntetela. Ke na le seswantšho se sennyane, selo se sennyane ke nyakago go le botša ka sona.

57 Bošegong bjo bongwe ke be ke le thari go goroga, gomme mme le bona ba be ba lebeletše nako ye telele, gomme Sarah le Rebekah, ba apere dipitšama tša bona, gomme ba be ba letile. Ye e bile pele Joseph a belegwa. Gomme ba be ba ntetše go goroga, gomme go bile thari. Kopano ga se ya ke ya tswalela go fihla thari, gomme ke ile ka swanelwa ke go otlela ditsela tše telele, gomme ka fao mmagobona o ile a bea baisa ba bannyane malaong.

58 Ga se ka ke ka goroga go fihla e ka ba iri ya bobedi goba ya boraro mosong, ke tsene, ka robala, ka swarwa ke boroko. Go bapa e ka ba ka iri ya bohloano goba ya boselela, ke lapile le go tšhoga go tšwa kopanong le dipono, le go ya pele, ke tsogile, ke ile ka kamoreng ya ka pele, ka dula fase ka setulong.

59 Mo dinakwaneng di se kae Rebekah a tsoga, o lebeletše go dikologa, letšatši le be le hlabile, o naganne, “Gabotse, Papa o gae bjale.” Gomme o lebeletše godimo gomme o bone samme wa gagwe yo monnyane, Sarah, a robetše. O tšwele ka malaong, šo o tla go kgabola kamora, o phafošitše Sarah. Sarah o lemogile letšatši le be le hlabile, kafao šo o tla ka morago ga Becky.

60 Ga ke tsebe ka bana ba lena, eupša yo mogologolo o hwetša diaparo, gomme wa go latela o hwetša mahлагаletšwa. Gomme kafao, Sarah o be a apere dipitšama tša Becky, maoto a be a le botelele kudu, gomme di be di le tše kgolo kudu go yena, gomme ke yo monnyane nthatana, moisa yo mokopana.

61 Gomme Becky o be a kgona go kitima gabotse, kafao o šiile Sarah. Gomme Sarah, wona maoto a magolo a phaphasela boka dieta tša mmutla wa lehlwa, a etla go kgabola fale, a wela godimo ga se sengwe le se sengwe. Eupša Becky o kitimile, o fihlile fale pele, gomme o tabogetše godimo difarong tša ka, gomme a lahlela matsogo bobedi go ntikologa, gomme a nkgokarela. Gomme, oo, le tseba ka fao e go dirago o ikwele. Oo, ke be ke se ka lapa seripa ka morago ga fao.

62 Gomme ka morago ga lebakana, Sarah yo monnyane o fihlile lefelongtiragalo, ka morago ga ge a tsogile makga a mabedi goba a mararo. Gomme o be a eme mojako, gomme o lebeletše, gomme Becky o retologile go dikologa, o lebeletše Sarah, o rile, “Sarah, samme wa ka, ke nyaka o tsebe se sengwe,” gomme o rile, “Ke bile mo pele, gomme ke swere Papa gohle, gomme ga go selo se go šaletšego.” Gabotse. . . [Ga go selo go theipi—Mor.]

63 Gomme Sarah yo monnyane, dipounama tša gagwe tše nnyane tša petla, mahlo a gagwe a mannyane, a matsothwa a thoma go seka meokgo, gomme a retologa go dikologa. Ke mo lebeletše, ke a holofela yeo ke tsela ye Modimo a ntebelelago dinako tše dingwe, gomme o be a swabile kudu gobane Becky o be a fihlile kua pele, gomme o be a dutše thwi go kgabaganya leoto la ka, gomme o be a na le matsogo a gagwe go ntikologa. [Ga go selo go theipi—Mor.]

64 Bjale, o ka se kgone go tleleima nthatana ye nngwe le ye nngwe ya Modimo, go ne sekgoba bakeng sa ba bangwe gape, ga go kgathale ke mang a bilego fale pele.

65 Gomme ka gona ge Sarah yo monnyane a thoma go tloga, gomme ke mo lebeletše ka mokgwa *wola*, gomme o lebeletše ka mathoko go nna, gomme wona mahlo a mannyane, a matsothwa a seka meokgo, ke mo šupeditše ka monwana wa ka, ge Becky a bile le hlago ya gagwe e ithekgile ka ya ka, ke ntšhitše letolo le lengwe. Gomme šo o a tla gomme o tabogetše godimo letolong la ka. Gomme o be a le mohuta wa sekai sa Full Gospel, o be a se maotomatelele go lekanela go ikgantšha ka e ka ba ka lefe “moragorago go ya mathomong,” le dilo, o be a le mohuta boka wa go thekesela, gomme ke ile ka swanela go bea matsogo bobedi go mo dikologa go mo swaretšša, gobane ke be ke boifa o be a tla wa letolong la ka.

66 Eupša Becky o be a le maotomatelele, gomme o be a tseparetše gabotse, gomme o be a kgona go itshwareletša yenamong, eupša Sarah o be a sa kgone go itshwareletša yenamong, o be a thekesela, gomme ke beile letsogo la ka go dikologa Sarah ka mokgwa *wola*, gomme ka mo gokara kgauswi le nna ka kgonthe. O ile a sehumola makga a mane goba a mahlano, gomme morago a lebelela morago, gomme a re, “Rebekah, samme wa ka, ke nyaka go go botšša se sengwe, le nna.”

O rile, “E ka no ba therešo gore o swere Papa gohle, eupša ke nyaka o tsebe selo se tee, Papa o ntshwere gohle.”

⁶⁷ Ke ka tsela ye go lego ka Ebangedi ye, Ebangedi ya fešene ya kgale, nka no se be le thutamodimo yohle, eupša selo se tee ke se tsebago, ke nyaka Kriste go ba le nna yohle, gore O tla ntshwara. Ga go kgathale ka fao ke sa itshwarego gabotse, le ka fao ke tabogago, le go kitima, go goelesa, le go kgamathela, seo ga se dire e ka ba eng go dira le yona, ge feela A na le nna ka taolong ya Gagwe ya go tlala, ga ke kgathale se gape se diregago, se segolo bjang, goba ke eng gape. Nna moka, Morena, e no mpoloka ke phuthetšwe ka matsogong a Gago. Seo ke se nna, ke tshwenyegago ka sona sohle.

⁶⁸ Ba a botšiša lehono, morago ga ge ba hlalošeditše se sengwe le se sengwe thoko, gomme ba re, “Wona matšatši ohle a be a ile. Gobaneng, barutiši ba rena moragorago mošola ba re boditše gore tšona dilo di fedile le baapostola, le go ya pele,” morago ba re, “Modimo o kae? Modimo yo mogolo yola o kae? Ba kae batho bale lehono ka dikerekeng tša rena, bao ba ekago go bokomonisi, le se sengwe le se sengwe gape ka mokgwa woo? Ba be ba se na le yona ka Kerekeng ya pele.”

⁶⁹ Ba be ba dutše ka tsela ye nngwe, gobane ba bile le Sengwe morago kua seo se ba dirilego komana go ya lehung bakeng sa dilo tše le dikokwane tše tšeo Kriste a di emetšego, gobane Kriste o be a le ka pelong. Oo, seo ke se re se hlokago, morago. . . [Ga go selo go theipi—Mor.] . . . go ya mathomong.

⁷⁰ Go a nkgopotša ka Beibeleng, ke boletše kanegelo, ke e badile ka fale, moo ka bogolo bja mengwaga ye lesomepedi, Jesu o ile a išwa Monyanyeng wa Pentecost, le mme wa Gagwe le tate mohlakomedi wa Gagwe. Gomme ba ile godimo go Pentecost bakeng sa thapelo, gomme, oo, ba be ba tšerwe ke kiti ya bagwera ba bona kudu, le se sengwe le se sengwe, ge thapelo ya bona e fedile gomme ba thomile go boela morago, ba ile leeto la matšatši a mararo ntle le Yena, ba no nagana O be a le felotsoko magareng ga leloko la bona.

⁷¹ Ke no makala ge eba ga se ra sepela leeto le lennyane, re no nagana, “O lokile. Ya.” Ke a makala ge eba setšhaba se ga se sa dira ka mokgwa woo. “Oo, re setšhaba sa bodumedi, Modimo o na le rena, gomme seo ke sohle se dirago phapano e ka ba efe. O re thušitše ka ntweng, kafao ga go dire phapano,” go no tšea gore O be a na le leloko la bona. Mafelelong, ba hweditše go hlobaela ka Yena, gomme ba ile morago go leloko la bona gomme ga se ba Mo hwetša.

⁷² Gomme yeo ke tsela ye go lego lehono, re ya morago go leloko la rena la bodumedi. Re dira eng? Re ya morago go kereke ye e itšego ye kgolo. “Gabotse, go reng ka Modimo, gore maatla a wele ka Letšatši la Pentecost?”

“Oo, seo se be se le ka go letšatši le lengwe, leo e be e se le.”

“Phodišo Kgethwa e kae?”

⁷³ Dikereke di thomile go šikinyegela morago, banna ba letšatši le. Ngwanešu du Plessis o be a ka kgona go le botša selo sa go swana, gore baetapele ba bagolo magareng ga dikereke tše kgolo ba thomile go lebelela morago, ba hlola godimo. Gomme banna ba Lutheran, bokamorago bja Presbyterian, ba tsona Selo sa kgonthe seo se welego ka Letšatši la Pentecost. Yeo ke nnete. Ga ba Se hwetše ka go dikerekemaina tša bona le dilo, eupša ba ikgobokanya bonabeng mmogo gomme ba re, “Re Mo tlogetše kae? Ga A magareng ga leloko la rena. Ga A magareng ga bao re ba tlwaetšego.”

⁷⁴ Ba Mo tlogetše kae? Ke kae, Jesu o tlogetšwe kae? Mokateng wa Pentecost.

⁷⁵ Fao ke tlwa moo kereke e Mo tlogetšego. Ba Mo tlogetše mo Pentecost. Tsela e nnoši ba tla hwetšago Molaetša wa kgonthe, ke go ya morago go Pentecost, moo le Mo tlogetšego. Eyang morago moo Moya wo Mokgethwa o tlilego boka phefo ye maatla e tšutlago, gomme wa wela godimo ga Kereke. Dipelo tša bona di be di tuka, gomme di swele ka maatla a Modimo. Ba ile pele ba fodiša balwetši, le go lelekelala meoya ye mebe ntle, le go profeta, go bolela ka maleme, le go bontšha maswao le matete. Yeo ke tsela e nnoši, ngwanešu le kgaetšedi, yeo re ka tsogego ra kgona go hwetša Modimo morago ka kerekeng, ke go ya morago moo re Mo tlogetšego gona, mo mathomong.

⁷⁶ Gabotse bjalo ka Martin Luther le ba bantši ba bampshafatši ba bangwe ba bagolo ka letšatšing la bona, gabotse bjalo ka ge ba bile, banna ba bangwe ba bagolo ba bodumedi, re ka se kgone go ya morago ka go tšona dilo le go O hwetša, re swanetše go ya morago go ona mathomo, morago go Pentecost, ke moo re Mo tlogetšego, ke moo kereke e Mo tlogetšego. Ke moo baetapele ba bagolo ba Lutheran, le Presbyterian, go ya pele, ba obeletšago morago ka dikerekemaina tša bona gomme ga ba kgone go Mo hwetša, gomme ba ya morago go Ebangedi ya go tlala, ba swerwe ke tlala le go nyorelwa Modimo. Haleluya!

⁷⁷ “Bohle Tate a Mphilego, ba tla tla go Nna, go sa kgathale ge eba ke bona Methodist, Baptist, Presbyterian, goba Lutheran.” Modimo o na le bana ka kerekeng ya Katoliki, O na le bana ka kerekeng ya Orthodox ya Bajuda, O na le bana ka kerekeng ya Baptist, ka go Presbyterian, ka go Lutheran. Nnete. Gomme ba thoma go swarwa ke tlala gobane ba Mo fošitše.

⁷⁸ Metlwae ya rena, dithutotumelo tša rena tša kereke di ka se tsoge tša kgotsofatša pelo ye e biditšwego ke Modimo. O ka se kgone go mo dira a bolele Thutotumelo ya Baapostola, goba a fafatšwe, goba se sengwe boka seo, gomme a kgotsofale ka yona. Ge tlala ya Modimo e le ka soulong ya gagwe, o tla ya morago go Pentecost, mo mathomong, gomme a hwetša Moya wo

Mokgethwa wa kgonthe woo o tukišago pelo ya gagwe. Amene. Seo ke se re se hlokago, morago mathomong.

⁷⁹ Jesu o rile, “Go be go se bjalo go tloga mathomong.”

⁸⁰ Jesu gape o rile, “Ka letšatšing leo. . .” O rile, “Ke nna Morara, lena le makala. Ke nna Morara.”

⁸¹ Bjale, theetšang, bagwera, lena babjadi ba monamune, le lena banna ba diterebe fa, bao le bjalago diterebe, le e ka ba eng le e bjalago, ge morara o eya pele, gomme lekala la pele le le tšwago go morara wola le enywa diterebe, lekala la bobedi le tla enywa diterebe, lekala la boraro le tla enywa diterebe, gomme lekala le lengwe le le lengwe leo le tšwago go morara wola le tla enywa diterebe, nnete, gobane ke morara wa terebe.

⁸² Gomme ge kereke ya mathomo yeo e tšwilego go Morara wola e be e le kereke ya Pentecostal, yeo e ngwadilego Puku ya Ditiro ka morago ga yona, kereke ya bobedi e tšwelelago e tla dira selo sa go swana, le kereke ya boraro. Gomme kereke ye nngwe le ye nngwe yeo e tsogago go tšwa go Morara wola e tla ba kereke ya Pentecostal, ka maswao a go swana le matete ao Morara wa pele o a tšweleditšego, goba, lekala la pele le a tšweleditšego. Go tla ba boka Pentecost, kereke ye nngwe le ye nngwe yeo e tsogago go tšwa go Morara wola e tla ba kereke ya Pentecostal.

⁸³ Bjale, seo se kwagala go tlabaa. Eupša le a tseba, go ne dilo tše dingwe tše dintši di gola go bapa le Morara, tšeo di sa tšweletšego Merara, di sa tšweletšego makala, a ke re. Bjale, go na le le—le lekala la Pentecostal la Bajuda le tšwago mohlareng wola, goba, go tšwa go Morara wola ka Letšatši la Pentecost. Gomme re bofelong bja tsela bjale, lekala la Bantle leo le tšwago mohlareng wola le tla ba le boitemogelo bja Pentecostal.

⁸⁴ O Modimo, ke duma ge nka kgona go kgoromeletša seo ka dipelong, ke duma ge nkabe ke na le *se sengwe gape*, seo ke bego nka kgona go laetša batho, gore lekala la mathomo go tšwa go Morara le entšwe bohlatse bja Pentecostal, lekala la bobedi le tla enywa bohlatse bja Pentecostal. Oo, ke lena bao, morago mathomong, morago moo re thomilego.

⁸⁵ Ke ka lebaka leo lehono, gore ka metlwae, le go ya pele, re hlalošeditše kgole tšohle tša kagodimogatlhago, gore Moya wo Mokgethwa o tlile, wa wela godimo ga batho, ba thoma go bolela ka maleme, batho ba dirile metlae ka bona, ba ba biditše bapshikologibakgethwa, gomme ba ba lahlela ntle lehlakoreng le tee. Ba tšwetšepele ba gola, ba gola.

⁸⁶ E tla go eng bjale? Dilo tše kgolwane go feta se. Ditirelo tša phodišo Kgethwa di thomile. Ka gona Morongwa wa Morena o tlile ka gare, a bonagatša meboya ya dimpho, a utolla morago gape wona Moya wo o swanago wo o bego o le ka Kerekeng mathomong, wo o tsebilego diphiri tša pelo, gomme o kgonneggo go se bolela, e bego e le leswao la Mesia. Beibele e boletše bjalo, Beibele e a e bega. Gomme ge leo e be e le leswao la Mesia

mathomong, ke leswao la Mesia mafelelong. Oo, ge le ka kgona go e bona! "A yo a nago le ditsebe, a kwe; yo a nago le mahlo, a bone."

⁸⁷ Ge go be go le bjalo mathomong, gore Jesu Kriste o itsebišitše ka Boyena go lebaka la mafelelo la Bajuda le Basamaria ka leswao la Bomesia, leswao lela la go swana le tla direga bofelong bja Bantle, gobane ke lekala le lengwe go tšwa go Morara wa go swana.

⁸⁸ Gobaneng, bophelo ka go morara bo tšweletša diterebe, lekala la bobedi le tla tšweletša diterebe. Bjale, o ka hlomesetša se sengwe ka fale, o ka tšea sehlomesetšwa, gomme wa se bea ka fale, se ka se tsoge sa enywa bophelo bja morara. Nnete. Aowa, mohlomphegi. Bophelo bja morara ke diterebe, le tla enywa diterebe, le lengwe le le lengwe o le tšweletšago, le lengwe le le lengwe o le tšweletšago le tla enywa diterebe. Motho a ka hlomesetša e ka ba eng ka fale. Seo ke se e lego bothata lehono, re hlomeseditše thuto ye ntši kudu ya madirwakemotho, re na le merakabidi ya lešoka le se sengwe le se sengwe gape ka go yona. Eupša ge Morara Wonamong o hloga lekala, e tla ba lekala la Pentecostal le tletšego ka Moya wo Mokgethwa, le dira maswao a go swana le matete ao ba a dirilego mo mathomong.

⁸⁹ O re, "Gabotse, kereke ya gešo ga e dumele go seo."

Go be go se bjalo mathomong.

"Kereke ya gešo ga e dumele go goeletšeng."

Go be go se bjalo mathomong.

"Kereke ya gešo ga e dumele go boleleng ka maleme."

Go be go se bjalo mathomong.

"Kereke ya gešo ga e dumele go go karabetša meetseng."

Go be go se bjalo mathomong.

⁹⁰ Dithuto tšohle tše kgolo tše le metheo ye Beibele e e rutago, go bile bjalo mathomong, gomme lekala le lengwe le le lengwe leo le tšwago go Morara wola, le tla ba selo sa go swana lehono ge lekala le ešwa go Morara le tlišitšwe godimo ga Morara. Lena le na le makala a madirwakemotho.

⁹¹ Le bona seo tikologong fa lehono. Ba tla hlomesetša mohlare, ba phatlola se sengwe go o tee, gomme ba se hlomesetša godimo fa go wo mongwe. Seo ga se se mohlare wola o se tšweleditšego. O no fa bophelo bja go lekanela go swarelela go wona, eupša ga se kenywa ya setlogo go tšwa mohlareng. Eupša ge mohlare wola o hloga lekala, le tla swana le la pele o le tšweleditšego.

⁹² Gomme ge Kereke e tšweletša kereke ye nngwe, e tla ba kereke ya Pentecostal ka maswao a ditiro ka go baapostola, e dira selo sa go swana ka Jesu wa go swana, e šoma go swana, gobane O a swana, maabane, lehono, le go ya go ile. Lekala la Pentecostal, le tladitšwego ka Moya wo Mokgethwa, maswao le

matete a tsogo, dilo tše kgolo di direga magareng ga bona, “Bao ba tsebago Modimo wa bona ka matsatšing a mafelelo ba tla dira tše kgolo.” Ee, re mo nakong ya bofelo.

⁹³ Bothata ke eng ka lefase? Nka no tswalela ka go bolela se: Phošo ke eng ka lefase?

⁹⁴ Go nkgopotša se sengwe seo se diregilego fa dikgwedi di se kae tša go feta ka toropongkgolo ya Louisville, Kentucky, feela go kgabaganya noka go tloga moo ke dulago. Go bile le mohumagadi yo a bilego le lesea le lennyane, oo, ke a thanka moisa yo monnyane o be a ka ba mengwaga ye meraro goba ye mene bogolo, gomme o be a mo tšeela ka lebenkeleng la disente tše lesome, a sepelasepela fale, gomme o be a topa se sengwe, gomme a re, “Lebelela fa, Moratiwa. Lebelela, Moratwa,” gomme lesea le lennyane le be le no tsepelela.

⁹⁵ Ka gona a topa se sengwe gape, a re, “Lebelela fa, Moratiwa,” gomme lesea le lennyane le nno tsepelela. Batho... O ile a tšhoga, batho ba thoma go mo šetša, batho ba ba bego ba le ka lebenkeleng, ba šeditše, ba theeditše ge a be a eya go tloga khaontareng go ya khaontareng, le go topa se sengwe, gomme a re, “Lebelela, Hani. A mošemane yo monnyane wa Mama o bona se?” O be a tla no dula gomme a tsepelela.

⁹⁶ Gomme ka morago ga lebakana, o topile pele ye nnyane, o be a topa dibapadišwa tše nnyane, le go ya pele, feela boka mošemane yo monnyane wa mengwaga yeo a swanetše go gogwa ke tšona, gomme o be a tla di šikinya. Mafelelong, o topile pele ye nnyane, gomme o e šikintše, gomme o nno tsepelela. O rile, “A ga o kwe yeo, Hani? Lebelela fa, moratwa wa Mama, lebelela! O bona yeo?” Gomme mošemane yo monnyane o nno tsepelela.

Gomme o wetše go kgabaganya khaontara, o rile, “Oo, aowa, aowa, aowa, ga go bjalo!”

⁹⁷ Gomme ba bangwe ba batho ba kitima go dikologa go hwetša gore molato e be e le eng ka mosadi. Gomme ge ba dirile, ba kitima go dikologa go bona se e bego e le bothata ka yena, ba tla go hwetša, gore mošemane yo monnyane o be a sa tšo ba go ngaka, gomme se sengwe se mo diragaletše, gomme o be a lahlegetšwe ke kgahlego yohle ya e ka ba eng boka mošemane yo monnyane a swanetše ka go mengwaga yeo, o nno dula a tsepeletše lefaufaug. Se sengwe kgopolong se diregile go yena, gomme ga se a ke a ela šedi ye e itšego go dilo tše di tlišitšwego go yena, boka mošemane a swanetše go e lebelela ka go mengwaga yeo. Gomme o rile, “Ngaka o rile o kaonana, eupša ga a bjalo.”

⁹⁸ Seo ke se e lego bothata, bontši ka moka boka kereke lehono, Modimo o tšeetše kereke ka matsogong a Gagwe, gomme O šikintše Oral Roberts, Tommy Osborn, Tommy Hicks, dimpho tše dingwe tše dintši le matete O di šikintše pele ga mahlo a batho, gomme bao ba tleleimago go ba ba bodumedi, gomme ba dutše

gomme ba tsepeletše, gomme ba dira mo o ka rego ebile ga se ba fe šedi ye e itšego go yona.

⁹⁹ Go na le se sengwe sa phošo monaganong ka kereke, se sengwe se fošagetše. Modimo o pealatša dimpho tša Gagwe, ba tla sepela go dikologa, ba re, “Oo, go bala monagano. Oo, ba no itiriša go bolela ka maleme gola, ga go selo go yona.” Ba bona batho ba goelela le go tumiša Modimo ka megokgo e kitima go theoga marama a bona, “Aa, o nno itiriša, ga go selo go yona.”

¹⁰⁰ Le a bona, kereke e swanetše go be e neela šedi go seo, Mokriste, gobane go ngwadilwe ka go Lentšu, ba dirile seo mathomong. Go na le se sengwe sa phošo ka kereke, se sengwe sa phošo ka batho, se sengwe sa phošo ka setšhaba.

¹⁰¹ Re swanetše go ya morago mathomong, go ya morago moo re tlogetšego Jesu, go ya morago moo kereke e Mo tlogetšego. Kereke e Mo tlogetše moketeng wa Pentecostal, boka mme le bona ba dirile, boka Maria a dirile, boka Josefa a dirile, ba be ba le batho ba go loka, eupša ba tlogetše Jesu kua Pentecost. Batho lehono ke batho ba bakaone, batho ba bodumedi, eupša ba tlogela Jesu kua Pentecost, ba a e boifa, ba ka se e sware.

¹⁰² Ke dihlong go nagana ka yona, eupša go no swana, Modimo o fa, tšhegofatšo ya Pentecostal e fa. Ga go kgathale ba leka go O tlošetša thoko gakaakang, Modimo o ya thwi pele a ba fa Moya wo Mokgethwa ba ba dumelago ka go Wona, a bontšha maswao a Gagwe le matete gore ka Letšatši la Kahlolo, A se be le boikarabelo. Eupša re tla ba le boikarabelo go se hlokomeleng se A re laeditšego ka Lentšu la Gagwe le ka Moya wa Gagwe. Yeo ke therešo.

¹⁰³ Modimo o mo bjale, ga go lebaka go batho ba go babja go be ba robetše mo botelele bjo bo itšego. ga go bohlokwa go batho go be ba dutše ka ditulong tša bagolofadi, ba robetše ka dikhotheng, le—le dimuma, le go ya pele. Modimo o fa, Modimo o fa, maatla a Moya wo Mokgethwa a fa, Jesu wa go swana yo a dirilego matete mathomong o mo.

¹⁰⁴ Eupša o re, “Gabotse, gobaneng batho ba sa robetše ba babja?”

¹⁰⁵ Go bile ba bantši ba robetše ba babja ka letšatšing la Gagwe, le gona. O fetile go kgabola mogobeng wa Betheseda, go be go robetše lešaba le legolo, ba bantši, batho ba dikete tše pedi goba tše tharo, mohlomongwe, ba robetše tikologong kua, dihlotša, difofu, digole, le ba go omelela, O ile thwi go kgabola batheeletši bale go fihla A hweditše monna a robetše godimo ga leako. Gomme O tsebile gore o be a le ka seemong se lebaka la mengwaga ye *mentši kudu*. Gomme O rile, “Mohlomphegi, a o ka rata go fola?”

O rile, “Ga ke ne yo a mpeago ka meetseng.”

O rile, “Tšea malao a gago gomme o ye ka ntlong ya gago.”

106 Jesu o ile a botšišwa, ntle le pelaelo, gobaneng A se a fodiša ka moka ga bona. O rile, “Ruri, ruri, Ke re go lena, Morwa ga a kgone go dira selo ka go Yenamong, eupša se A bonago Tate a se dira.”

107 Go na le batho ba bantši ba babjago letšatši leo mosadi a gateletšego go kgabola lešaba gomme a kgwatha seaparo sa Gagwe, go ka no ba go bile le makgolo a batho ba go babja ba eme tikologong fale, eupša o Mo kgwathile ka kgwatho ye e tlišitšego Modimo kua lefelongtiragalo bakeng sa gagwe.

108 Yoo e be e le Modimo mathomong, yoo ke Modimo lehono, A ka se kgone go fetoga, Yena ke Modimo wa go swana. O fodiša ka tumelo, yeo ke tsela ye A e boletšego mathomong, leo ke leswao A le beilego fase, e sego ka phološo ya gago, e sego ka go loka ga gago, e sego ka tšhelete ya gago, e sego ka boingwadišo bja gago bja kereke, eupša ka tumelo ya gago, seo ke se e lego sona.

109 Ge o ka kgona go e dumela, O tla itsebiša ka Boyena gore O gona, O tla itsebiša Yenamong gore O a phela, O tla itsebiša Yenamong gore Yena ke Modimo wa Pentecost, O tla itsebiša Yenamong ka Kerekeng ya Gagwe, gore Yena ke Jesu Kriste wa go swana maabane, lehono, le go ya go ile. Eupša A ka se tsoge a go kgwatha, go fihla o Mo kgwatha pele. Yeo ke nnete. O tla ipontšha Yenamong, eupša o swanetše go e dira. Amene. A le dumela seo?

A re rapeleng.

110 Tate wa Legodimong, mantšu a ka a ka ba bjalo ka mphiri wo o llago le moropa wo o llago, eupša Lentšu le tee go tšwa go Wena, Morena, le tla fetola lefelotiragalo ka moka. A nke go tsebje bošegong bjo, Morena, gore mantšu a a ripaganego ke therešo. Ke a rapela gore O tla a tliša mmogo ka tsela ye nngwe gomme wa a nweletša ka dipelong tša batho, gomme wa ba dira ba tsebe gore O sa le Jesu bošegong bjo, Morwa yo mogolo wa Modimo Yo a sepetšego go kgabola Galelia gomme a se a tsoge a dira tlhompho ya motho, eupša mang kapa mang a bilego le tumelo go Mo kgwatha, mang kapa mang a bilego le tumelo, o fodišitšwe.

111 Mašabašaba a a fetilego kgauswi, bao ga se ba ke ba amogela phodišo ka baka la gore ba be ba sa e dumele. Eupša bao . . . Ge O ile ka nageng ya Geno Mong, mediro ye mentši ye maatla, ga se O kgone go e dira, ka baka la gosedumele ga bona. Go bjalo bošegong bjo, yeo ke tsela ye go bilego mathomong, yeo ke tsela ye go lego bošegong bjo.

112 Eupša O sepetše go kgabola batho le go bontšha batho gore O be o le Mesia. Ge O boditše Petro o be a le mang, leina la gagwe e be e le mang, o Go tsebile thwi ka pela gore O be o le Morwa wa Modimo, ge O boditše Filipi, le Nathaniele, le tlase go kgabola Beibele, mosadi wa Mosamaria, ba bangwe ba bantši.

113 Re a botšwa ka Beibeleng, gore Lentšu la Modimo, e lego Jesu, “Mathomong go be go le Lentšu, gomme Lentšu le be le le go Modimo, gomme Lentšu e be e le Modimo. Gomme Lentšu la dirwa nama, gomme la dula magareng ga rena. Lentšu,” Jesu, “le bogale kudu go feta tšhoša ya magalemabedi, le phuleletša ebile go aroganya, le moko wa lerapo, le Mohlathi wa dikgopolo tša pelo. Jesu Kriste, wa go swana maabane, lehono, le go ya go ile.”

114 O Modimo wa Legodimo, go boneng meriti ya mantšiboa e ewa, nako e batamela, gomme Wena o mogau kudu, Morena, a nke batho ba bone bošegong bjo gore O mogau, O tletše lerato, gomme o tletše ka kgaogelo, le go tla la ka kwelobohloko. Gomme bjale, a nke batho ba bao ba šegofaditšwego ka go amogela Moya wo Mokgethwa wa Gago, ba bao ba šegofaditšwego go kwa pitšo ya Modimo ka bophelong bja bona, ke a rapela, Tate, gore O tla ba fa tumelo go gatelela ka gare bjale le go kgwatha kobo ya Gagwe, Moprsta yo Mogolo yo a dutšego ka seatleng se setona sa Modimo Legodimong, a loketšego go kgwathwa, a swerego ya Gagwe ntle, e sego feela kobo ya Gagwe, eupša seatla sa Gagwe, go inola motho yo mongwe le yo mongwe a nwelelago bošegong bjo, bao ba se nago kholofelo, le go ba fa kgaogelo, le go fodiša mebele ya bona. E fe, Tate. Ka Leina la Jesu, ke a rapela. Amene.

115 Sešupanako sa ka ga se sa tima, ke bile le sona se beilwe lebaka la metsotso ye masomepedi, eupša ke kitima nthatana gannyane, e ka ba metsotso ye masomepedi tlhano, eupša ga se ke re go le swarelela botelele bjalo. Eupša a le a dumela molaetša wola ke therešo? A le a o dumela? “Morago mathomong. Morago mathomong.”

116 Ge yo mongwe a re, “Ga ke dumele go phodišo Kgethwa.”

Le re, “Go be go se bjalo go tloga mathomong.”

“Ga ke dumele go kolobetšo ya Moya wo Mokgethwa.”

“Go be go se bjalo go tloga mathomong.”

“Ga ke dumele go phodišo Kgethwa.”

“Go be go se bjalo go tloga mathomong.”

117 Gobane mathomong ba dumetše go—go kolobetšo ya Moya wo Mokgethwa, ba dumetše go go boleleng ka maleme, ba dumetše go dimpho tšohle tša semoya. Paulo o di ngwadile ka go Puku ya Bakorinthe le go bea Kereke ka lenaneo. Yeo ke tsela ye go bego go le mathomong, yeo e be e le thato ya Modimo mathomong, Yena ke Modimo mohlokamagomo, A ka se kgone go fetoga, ge yeo e be e le thato ya Gagwe mathomong, yeo ke thato ya Gagwe bošegong bjo, eng kapa eng kgahlanong le seo, ke mahodu, gomme ke monna yo a fapošago melao ya Modimo.

118 Gona re a makala, “Kereke yela ya semoya e kae lehono? Kereke yela e šikintšego lefase e kae mo mathomong?” Bothata ke eng?

119 Ke kwele moebangedi wa go tsebega e sego kgale kudu, a re, “Ke ile ka toropongkgolo gomme ka swara tsošetšo, ka fale re tleimile basokologi ba dikete tše masometharo ka dibeke tše tshela.” O rile, “Ke ile morago ka go ngwaga wo mongwe, ga se re kgone go hwetša masometharo go ba dikete tše masometharo.” O rile, “Bothata ke eng? Ke lena bareri ba dibodu, le dutšego ka maoto a lena godimo ga teseke, gomme le sa ye ntle le go bona batho.” Oo, ka fao a ba tšhumilego!

120 Ke naganne, “Mohlomphegi, yeo ke therešo, bontši bja yona. Eupša ke nyaka go go botšiša se sengwe, o rile Paulo o ile ka toropongkgolo gomme o bile le mosokologi o tee, o ile morago ngwaga wo o latelago gomme o bile le masometharo go tšwa go yola. Paulo o dirile eng?”

121 O ba hlahletše Mothopong, e sego feela ka go šikinya diatla le go bea leina la bona godimo ga puku, e sego ka go dira mohuta tsoko wa boipolelo le go tshepiša o tla dira bokaonana, eupša go dula fale go fihlela o hwile gomme bophelo bja gago bo fihlilwe ka go Modimo ka Kriste le go tswalelelwa ke Moya wo Mokgethwa. Mollo wa Modimo o tla tuka ka dipelong tša bona, gomme o tla dira . . . ge wena . . .

122 Ge motho a ka amogela Kriste godimo ga motheo woo bošegong bjo, gomme ka tla morago mo ngwaga go tloga bjale, ke tla ba le ditlogolokhukhu khukhu khukhu khukhu khukhu khukhu go tšwa go yoo. Yeo ke nnete. Yeo ke nnete. Yo motee o tla hwetša yo mongwe yo motee, yo mongwe yo mongwe yo motee, yo mongwe yo mongwe, yo mongwe yo mongwe yo motee boka ka mokgwa woo. Eupša se o swanetšego go se dira pele, ke go tla kgauswi go lekanela.

123 Lefase le leka go phela, bošegong bjo, ka mollo wa go pentwa, ba leka go phela, ba leka go ruthela ka mollo wa go pentwa. O ka se kgone go dira seo, o penta seswantšho sa mollo, gomme wa re, “Oo, mohlomphegi, eya kua gomme o huthumale,” pente yela e ka se go huthumatše.

124 O swanetše go ba le mollo wo o phelago lehono, e sego go ya morago le go re ba bile le kereke ye kgolo letšatši le lengwe, gomme kereke ye kgolo morago kua, re tla hloka kereke ye kgolo lehono, gobane O sa le Modimo yo mogolo a lebeletšego batho ba bagolo bao ba tla Mo direlago ka pelo ya bona yohle, ba ba tla lebalago dithutotumelo tša bona, le go ya pele, gomme ba direla Modimo.

125 Ge o le Momethodist, dula o le Momethodist, eupša hwetša Moya wo Mokgethwa. Bjalo ka ge Ngwanešu David du Plessis a re, “Modimo ga a ne ditlogolo tše di itšego.” Ga a dire, Modimo o na le barwa le barwedi ka go felela, ga go ditlogolo, o a rereša. Ee, mohlomphegi.

126 Ge o le Momethodist, gomme o le morwa wa Modimo: Amene. Ge o le Momethodist, motšoeni wa kereke, o setlogolo gomme

ga o lemogwe le Modimo. Ge o le motšoeni wa kereke ya Pentecostal gobane papago o be a le Mopentecost, o Mopentecost, o setlogolo gomme e sego morwa. Eupša ge o tswetšwe ka Moya wa Modimo . . .

127 Modimo ga a ne ditlogolo, o a rereša, Ngwanešu du Plessis, ga a ne ditlogolo e ka ba dife. Le barwa le barwedi ba Modimo, goba ebile ga le ka lapeng. Modimo ga a ba lemoge.

128 E sego ka gobane tatago o be a le se sengwe, ke: *Wena* o eng? Motho yo mongwe le yo mongwe o swanetše go tswalwa gape, gomme tlhago ya gagwe ya sebe e bolawe ka go yena, gomme Monna yo moswa a tswalwe ka go yena, e lego Kriste Jesu, Morwa wa Modimo. Gona o ineela wenamong go felela go Kriste, gomme Kriste o tla ka gare, gomme o ngwala Puku ya Ditiro ka wena. Ka fao ke tsebago yeo ke therešo, bagwera ba ka, ka fao ke tsebago ke therešo!

129 Ke rile, ge o ka no ineela wenamong. . . Mosadi yola o dirile eng yoo a kgwathilego kobo ya Gagwe? O tsebile mkgwa wa go ineela yenamong, o Mo kgwathile ka go ineela yenamong.

130 Go reng ka dipono mo sefaleng ntle go kgabola fale, le godimo ga naga, e ka ba kae go lego? Ke go ineela wenamong go Moya wo Mokgethwa, go intšhetša ka ntle ga dikgopolo tša gago mong, gomme wa no hlhlwa ke Moya. Yeo ke nnete.

Ke a Mo rata, ke a Mo rata
Gobane O nthatile pele (A le dira seo?)
Gomme a lefela phološo ya ka
Godimo ga mohlare wa Khalibari.

131 Ke ba bakae Bakriste ba go tswalwa gape le ka phagamišago diatla tša lena le nna? Opelang yeo le nna bjale:

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga mohlare wa Khalibari.

132 Oo, se Moya o ka kgonago go se dira bjale! [Ngwanešu Branham o thoma go hama *Ke A Mo Rata—Mor.*]

Ke a Mo rata, ke . . .
Gobane . . . nthatile pele
Gomme a lefela phološo ya ka

133 Kgaetšedi godimo ga khote, a o na le karata ya thapelo? Ga o nayo. A o dumela se o se kwelego bošegong bjo go ba therešo? A o kile wa kwa ka dikopano tše pele? A o a dumela gore wena, ka seemong sa gago, o be o ka kgona go kgwatha morumo wa kobo ya Gagwe, Moprasta yo Mogolo? Ge A kgonne go tseba, feela boka A dirile mosadi mo sedibeng, se diemo tša gago di lego sona gomme a be a ka go botša, nna ke le mosetsebje go wena gomme ke tla go botša seemo sa gago, o nagana o be o ka ipshina ka

kopano gomme wa fola? O a dira. Ga ke go tsebe, ga se ka ke ka go bona. O mosetsebje go nna, eupša ga o yena go Yena.

¹³⁴ Bjale, seemo sa gago sese. Ntebelele, yeo ke yona, o ntumela go ba moprofeta wa Gagwe, mohlanka wa Gagwe? O a dira. O amogela seo, dumela seo. O bona se ke se rago, O mpoditše ge. . . “Ge o ka dira batho go go dumela. . .” Boka Petro le Johane ba rile, “Re lebelele.”

¹³⁵ Ga ke na le lesedi gore phošo ke eng ka wena, eupša O a dira, eupša A ka kgona go utolla go nna. Go go bona o retologa go dikologa fao, gomme o bea diatla tša gago fase ka mokgwa woo, o thoma go lla, o rapela. Bjale ke no ba, poledišano le wena. Bjale, ga re tsebane seng, o yo moswana kudu go feta ka mo ke lego, lekga la mathomo go tsoge ra kopana, eupša ke rena ba.

¹³⁶ Go na le kgokagano tsoko le motho yo fa, le wena. Mmago. A yeo ke nnete? Therešo.

¹³⁷ O nagana eng ka yona, mohumagadi? Ke tsebile bjang gore yola e be e le morwediago, gomme o be o le mme? Modimo o e utolotše. Ke a go leboga, kgaetšedi. Gona tlogela go tshwenyega ka kankere yela ka mogodung wa gago.

¹³⁸ Le bona se Moya wo Mokgethwa o ka kgonago go se dira?

¹³⁹ Gomme wena, mohumagadi yo moswa, bja gago ke mohuta tsoko wa aletši, e go fa bofokodi gomme ga o kgone go sepela dinako tše dingwe. E lebale, emelela go tloga khotheng ya gago, gomme o ye o ikhweletše setulo felotsoko ka batheeletšing. . . ? . . .

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga wa Khalibari. . .

¹⁴⁰ Tumišang Modimo. Bjale yo mongwe ntle kua. . . Ke ba bakae ntle kua ba babjago? Ema motsotso feela, kgaetšedi. Motsotso feela, mohumagadi yo moswa. Yo mongwe ntle kua yo a babjago, emišetša seatla sa gago godimo. Ge nka kgona go hwetša yo mongwe yo a babjago, a hlokago phodišo ya Morena. Ke hloka ditulo tše pedi, feela nakwana.

¹⁴¹ Morena, O a ba fa, hle, gore batho ba ke ba tsebe gore O Modimo, gomme melaetša ye ke therešo.

¹⁴² O na le diphaele, o a dumela Modimo o tla go dira o fole, o dutšego fale? Ya. O a ntumela? Ke mosetsebje go wena, a ke yena, lesogana? Ee, mohlomphegi, ke mosetsebje. O na le diphaele.

¹⁴³ Gale, monna yo a dutšego kgauswi le wena le yena o na le diphaele, yeo ke nnete, ka lehlakoreng le. Go lokile, o na le diphaele. Tatago o ya bjang mmogo? O thoma go bona bjale, a ga a? O fodišitšwe mo sefaleng bošegong bja go feta, ke moreri. Ga se ka ke ka go bona ka bophelong bja ka. Ge seo e le therešo, šikinya seatla sa gago. Bjale, o no tloga go tšwa go diphaele tša

gago, wena le monna yola eyang godimo gomme le feng mosadi yo ditulo tša lena. Eyang morago kua gomme le eme, gobane Modimo o le dirile le fole . . . ? . . . Amene.

Ke a Mo rata, (yeo ke . . .) ke a Mo rata (Go lokile, le ka ba le ditulo tša lena godimo fale.)
Gobane O nthatile pele
Gomme a lefela phološo ya ka
Godimo ga mohlare wa Khalibari. [Ga go selo go theipi—Mor.]

144 O na le maikutlo a go se tlwaelege ka kgonthe, a ga o nao, kgaetšedi? Aletši yela e ka se tsoge ya go tshwenya gape. O ka kgona go ya gae bjale gomme wa fola. Jesu Kriste o go dira o fole.

O bona ka fao A lokilego? Eba le tumelo.

145 Mohumagadi yo mogolo yo a dutšego thwi fale, a llago, le a bona, go na le Seetša sela godimo ga gagwe, seemo sela sa mafahla se a tloga, kgaetšedi. O ka no ya gae, le wena, wa fola. Jesu Kriste o go dira o fole.

146 Molaetša wo ke o rerilego bošegong bjo gore O a swana, go ya morago mathomong, o ka kgona go kgwatha kobo ya Gagwe, Yena ke Moprsta yo Mogolo go no swana bošegong bjo bjalo ka ge A bile nako yela, yoo a kgonago go kgwathwa ke . . .

147 (A o file dikarata tša thapelo, le yena, ntle kua?) . . . ? . . . O rile o file tše dingwe gape . . . ? . . . A re hwetšeng di se kae tša tšona godimo mo bjale, gore batho ba hwetše karata ya thapelo, ga re hloke eupša di se kae tša tšona, a re thomeng, gore ba kgone go rapelelwa, go no kitimiša mothalo wo monnyane go kgabola fa, thwi ka pela.

148 A re boneng, re thomile kae? Re ile tee go fihla go masometlhano, bošegong bja go feta, a ga se ra dira? A re nong go tšea ya mafelelo . . . [Ga go selo go theipi—Mor.]

149 Yeo ke nnete, O rile O tla ba fa. “Kae kapa kae ba babedi goba ba bararo ba kgobokanego Leineng la Ka, Ke tla ba magareng ga bona.”

150 Bjale, a O a swana maabane, lehono, le go ya go ile? A le Mo dumela go ba yo a swanago, yo a swanago ka kokwane, yo a swanago ka maatleng? Selo se nnoši se a fapana bošegong bjo, gore O šomiša nama ya gago le nama ya ka, gobane nama ya Gagwe e dutše ka seatleng se setona sa Terone ya Modimo ka bogošing ka Letagong. “Gomme yo a fenyago, o tla dula le Nna godimo ga terone ya Ka, bjalo ka ge Ke fentše gomme ke dutše godimo ga terone ya Tate wa Ka.” Le a bona?

151 Oo, a selo sa go makatša! Jesu Kriste, Morwa wa Modimo, a dutše ka Legodimong, gomme disoulo tšohle tše tša go hwa tšeo di no go ba ka tlase ga aletara, di lebelela godimo le go bona

mmele wola o dutšego fale, mmele wola wa nama. Oo, ke ikwela bodumedi! Mmele wola wa nama!

¹⁵² Le ela hloko, tlase ka Egepeta ba file mmele wa nama, Josefa, e bego e le sekai sa Jesu ka mokgwa wo mongwe le wo mongwe, mmele wola wa nama o robetše fale, gomme Moisraele yo mongwe le yo mongwe, a iteilwego ka mokokotlong wa bona, gomme—gomme a ntšhitšwe megogoma go tšwa go Baegepeta, o sepeletše tlase kua gomme a lebelela ka go khaskete yela gomme a bona lebitla lela, fale go be go robetše mmele wa Josefa, gomme o tsebile gore letšatši le lengwe ba be ba tla tšwa fale, ba be ba eya ka ntle. Ge mmele wola o tsogile go tšwa lebitleng lela, gomme ba o rwaletše ntle, ba be ba eya ntle le wona.

¹⁵³ Yeo ke tsela ya go swana go lego Legodimong. Disoulo tšela ka tlase ga aletara, di goeletšago, “Botelele gakaakang, Morena? Botelele gakaakang?” Di bjalo ka ditheophany kua. Eupša bjale, di lebeletše go mmele wola wa nama wa Morwa wa Modimo o dutšego fale, “Letšatši le lengwe O tla emelela go tšwa Teroneng yela.” Oo, nna! Bona ba ba lego ka go Kriste Modimo o tla ba tliša le Yena ka tsogong. Ba tla tšea, wo wa go hwa o tla tšea go se hwe, gomme ka gona re tla swana le Yena, re tla Mmona bjalo ka ge A le, ra ja Selalelo sa Monyanya le Yena, gomme bohle go ya go ile ra ba le Morena. A seo ga se kgahliše?

¹⁵⁴ O rometše Moya wo Mokgethwa wa Gagwe tlase fa go tla ka nameng ya rena, yeo A e hlwekišitšego ka Madi a Gagwe Mong. A le dumela go tlhwekišo? “Ebang ba bakgethwa, gobane Ke nna yo mokgethwa.” Bjale, o ka se kgone go ba yo mokgethwa, ga se ka itshama ka bokgethwa bja ka, ga ke nabjo, eupša ke itshamile ka bokgethwa bja Gagwe, ke bokgethwa bja Gagwe bjo ke bo lebeletšego. E sego se, gabotse, e sego se ke bego ke le sona, eupša se A lego sona. Yeo ke yona. Eyang morago mathomong. Seo yona. Jesu Kriste wa go swana maabane . . .

¹⁵⁵ Ba tlišeng bohle ka mothalong? Go lokile. Bjale Morena a šegofatše. Oo, nna, seo se no kwagala gabotse kudu. A le komana? A re nong go ema motsotso le ba bangwe ba batho ba.

¹⁵⁶ A re basetsebane seng sa rena, mohumagadi? Re bona.

¹⁵⁷ Ke—ke no ikwela go tlala kudu ka Moya wo Mokgethwa bošegong bjo, ke no ikwela go phophoma. Feela—feela, oo, ke duma ge e ka dula ka tsela ye, a nke e se tsoge ya tloga. O a dumela, bjo ke bošego bjo e ka ba eng e ka diregago.

¹⁵⁸ Bjale, ge ke be nka kgona go go fodiša, gomme ka se e dire, ke tla ba motho wa go befala, eupša nka se kgone go go fodiša. Eupša ge—ge Jesu Kriste, Morwa wa Modimo, yo a go fodišitšego, ge o babja, ga ke tsebe, eupša ge A go fodišitše, gomme a ka tla fa gomme a netefatša gore O eme fa a šoma ka nama ya ka, ka nama ya gago go wena go dumela gore O rometše Molaetša wo, gomme O fa go tlišetša Molaetša wo, gomme o tla dira se sengwe mo, boka A dirile mosadi sedibeng, a go tla go dira o Mo dumele? A

go ka se be le moriti wa pelaelo nako yeo? Ge A tseba se o bilego sona, ka kgonthe O tseba se o tla bago sona.

159 Bjale, mosadi yo le nna ga se ra ke ra tsoge ra bonana seng, ke a nagana, ka bophelong. Le ke lekga la mathomo nkilego ka mmona. Gomme o bolela gore re basetsebane seng sa rena, ke bolela sa go swana. Yeo ke nnete, a ga se yona? Re basetsebane. Go lokile.

160 Bjale, ge Jesu Kriste a dula a swana, maabane, lehono, le go ya go ile, gona O tla dira go swana maabane, lehono, le go ya go ile. Bjale, eyang morago mathomong. Mathomong e be e le eng, ka fao A dirilego batho go tseba gore O be a le Jesu Kriste, Mesia? O boletše diphiri tša pelo ya bona, ka seo, ba dumetše. A yeo ke nnete?

161 Mosadi mo sedibeng, o rile, “Etla . . . Re a tseba gore ge Mesia a etla, O tla re botša dilo tše, leswao la Mesia.” O rile, “Eupša Wena o Mang. A O moprofeta?”

O rile, “Ke nna Yena.”

162 O kitimetše toropongkgolo, a re, “Etlang, bonang Monna Yo a mpoditšego ka nnamong. A Yo ga se yena Mesia?” Gomme ba dumetše. Ba bile le tsošetšo ka morago ga fao ge Filipi a ile tlase kua, gobane ba be ba le badumedi.

163 Ge Morena a ka mpotša se bothata bja gago e lego, gona o tla ntumela go ba mohlanka wa Gagwe? Gore ke . . . Feela mpho yeo A swanetšego go . . . Ge . . . Bjale, nka se kgone go e dira ntle le ge o ntumela, ke ka baka leo ke go botšišago. Eupša go tla go thuša, gomme go tla thuša batheeletši.

164 A go tla dira, batheeletši? Bjale lebelelang fa, Beibele še, mosadi šo, seatla sa ka sese, bokgole bjo ke tsebago, ga se nke ka ke ka mmona. Ga ke mo tsebe, o dira go swana. Ga re . . . Ga a ntsebe (ga ke mo tsebe), le ge e ka ba leina. Eupša o a tseba . . . Ga ke tsebe leina la gagwe, ka nnete aowa. Eupša ke—ke no tseba ke mosadi o eme fale. A ka no tseba gore ke nna Ngwanešu Branham, ka go ba ka kopanong.

165 Bjale tlhompokgolo ka kgonthe. Bjale, a Jesu o a swana go tloga mathomong, bjale? Bjale, Beibele e re O a swana. A yeo ke nnete? Bjale, a ke Yena? Ke selo sa go latela. Bjale, ge A le yena, O tla dira sa go swana.

166 Bothata bja gago ka pshiong ya gago. Ga go makatše ga se o ntsebe, o tšwa kgole, kgole go tloga fa, ebile ga o tšwe Arizona, ga o tšwe United States, o tšwa Canada. Mdi. Carp, o ka kgona go ya morago Canada, gomme wa dirwa go fola, Jesu Kriste . . . Selo se sengwe, ke bone yo mongwe gape a tšwelela ka nageng ya go swana o tšwago go yona, mogwera wa go babja ka Canada o mo rapedišago, o tla ba hwetša ba fodile, ge o ka dumela.

167 A Jesu Kriste o a swana maabane, lehono, le go ya go ile? Tumišang Leina la Gagwe le Lekgethwa.

168 Re basetsebane seng sa rena, Modimo o tseba bobedi bja rena. Ga ke go tsebe, gomme mohlomongwe ga o ntsebe go feta ka leina, eupša Kriste o a go tseba. A o a dumela O kgona go nkutollela se bothata bja gago bo lego? A go tla go thuša go dumela? Go ka se go fodiše, eupša go tla go thuša go dumela. Go lokile.

169 Bjale, ge o tseba ga ke tsebe selo ka wena, gona ge Modimo a e utolla, e swanetše go tšwa go mothopo tsoko wa semoya thwi fa mo sefaleng se.

170 Naganang ka yona, kereke. Ka nnete le ka se time alamo. Aowa. Ke a tshepa gore Sebobodi se sennyane se tla no bobola ka pelong ya gago, Moya wo Mokgethwa bjale, gomme wa re, “Se boifeng, ke Nna.” Le a bona? Le a bona?

171 O bile le karo, lehwa, e be e se ya atlega kudu, karo ya lehwa e be e lokile, eupša o bile le setlamorago se sebe. Yeo ke nnete. Gomme karo e go hloletše go ba le mohuta tsoko wa se—se setlamorago go mogodu wa gago, o na le bothata bja mogodu.

172 Gomme o na le se sengwe sa phošo ka letsogo la gago. Yeo ke nnete, yeo ke therešo. Gore o ke o tsebe gore ke nna moprofeta wa Gagwe, mohlanka wa Gagwe. . . Ga go sa le go ba moprofeta wa Gagwe go feta ka mo go lego moreri wa Gagwe goba morutiši wa Gagwe. Ga ke lewe ke hlong ka Yena.

173 O a dumela mogatšago o ya go fola, le yena? O a dumela Modimo a ka mpotša bothata bja gagwe ke eng ntle kua? O na le aletši. Yeo ke nnete. Sepela, gomme tšea selo se sennyane seo o nago naso ka seatleng sa gago, gomme o se bee ka potleng ya gagwe, gomme aletši e ka se sa mo tshwenya gape ge o ka no dumela. Boela, gomme o dirwe go fola, ka gore Jesu Kriste o go dira o fole.

174 Gabotse, go ka reng ge ke go boditše gore bothata bja pelo bo go tlogetše o dutšego fao, ge o ka no e dumela. A o a e dumela? Go lokile, e no ya pele gabotse, e re, “Ke a Go leboga, Morena Jesu, ke a Go leboga.”

175 Re basetsebane seng sa rena. Ga—ga ke go tsebe, Modimo o a go tseba. O a dumela Modimo a ka nkutollela seo bothata bja gago e lego? A go be go tla go dira o dumele? Bjale, le a bona go ntira ke fokole, eupša ke no nyaka go bolela le wena bjale.

176 Se sengwe. . . eng. . . ? Ka kerekeng yo mongwe o fodišitšwe nako yeo. Phodišo ye kgolo e diregile, felotsoko. O ka no se e tsebe gonabjale, eupša o tla e hwetša. O e kwele. O bone Seetša. Gabotse, e ka ba mola Se tlogile gomme sa bowa morago.

177 O bone Seetša ge Se tlogile gomme sa bowa morago. Yeo ke nnete. Se eme thwi magareng ga rena gonabjale. O a bona? O bona Seo? Go lokile.

178 Ke wena yo. O—o a tlaišega, o bile le, ee, o bile le karo, le wena, gomme e hlotše se sengwe sa phošo ka go thišu, e magareng

ga, e ka ba pshio le sebudula. Gomme dingaka di nyaka go kara gape. Yeo ke nnete. O a dumela o ya go ba gabotse? O a dumela Modimo o a tseba gore o mang? Moh. Gray, o ka kgona go ya gae gomme wa fola. Jesu Kriste o a go fodiša. Eba le tumelo ka go Modimo.

179 Re basetsebane seng sa rena, mohlomphegi, ke a nagana lekga la rena la mathomo go tsoge ra kopana, eupša Modimo o tseba bobedi bja rena. A o a dumela Yena ke Modimo wa go swana, gore ge Simone Petro a tlile godimo pele ga Gagwe, O mo tsebile, o mmoditše tšohle ka ga yona? O a dumela ke Jesu wa go swana? Bjale, o tlaišega ka alesa. Yeo ke nnete. Ntle le seo, o na le yo mongwe o mo rapedišago, ke ngwana, morwedi, o na le mohuta wa lehuto, a ga a nalo?

180 Ga o tšwe fa le wena. Go na le se sengwe sa go tlabo ka wena. Ke bona mogwera wa ka, Mna. Norman, go tšwa . . . O tšwa Tucson. Yeo ke nnete. Mna. Johnson, o ka kgona go ya morago gae, gomme wa dirwa go fola. Jesu Kriste o go dira o fole.

181 Mothaka yo o kgokagane le mogwera wa ka, o be a le mo, Mna. Norman, felotsoko ka moagong, felotsoko.

182 O dumela Jesu Kriste? Go ka reng ge ke go boditše O go fodišitše thwi fao, a o ka tšea lentšu la ka bakeng sa yona? Eya pele tseleng ya gago, gomme o dirwe go fola, Jesu Kriste o go fodišitše.

183 Mogodu, eya o je, Jesu o go dira o fole.

184 Eba le tumelo. Haleluya!

185 O dumela bothata bja gago bja mokokotlo, le se sengwe le se sengwe, bo ya go go tlogela bjale, gomme o ya go ya gae, o fole? Eya pele, o hlalala, o re, “Ke a Go leboga, Jesu.”

186 O Mo rata ka pelo ya gago yohle? Ge o Mo rata . . .

187 Go ka reng ge ke go boditše, o fodišitšwe o etla godimo ga materapo, a o tla e dumela? E no ya pele ka tselo ya gago o hlalala, o re, “Ke a Go leboga.”

188 O ithuta kudu, seo ke se se dirilego seemo sela sa alesa ya mala ka mogodung wa gago. Bjale sepela o je selalelo sa gago, Jesu Kriste o go dira o fole. Go lokile.

189 O tšhogile, go hlotše o be le go thebatheba ka pelong ya gago. Sepela o fole bjale, sepela dumela Morena Jesu.

190 Gabotse, bjale, ge o ka dumela ka pelo ya gago yohle, bothata bjola bja mokokotlo bo tla tloga, gomme o ka se emelele ka mkgwa woo nako ya go latela, o tla ba gabotse. Sepela, dumela ka pelo ya gago yohle, eba le tumelo.

191 Letšhogo, bothata bja sehumagadi, le bothata bja pelo. O a dumela gore Modimo o ya go go dira o fole? Eya pele tseleng ya gago, gomme o re, “Ke a Go leboga.”

192 Go lokile. O a dumela? Go ka reng ge ke go boditše, o fodišitšwe, o eme fale, a o tla e dumela? Sepela, e dumele. Fola.

193 O dumela ka pelo ya gago yohle?

194 Go reng ka wena, mohumagadi? Ge ke go boditše gore o ya go fola, a o tla e dumela, ge ke go boditše? A o nyaka ke go botše se e lego phošo ka wena? A go tla—a go tla go thuša ge ke go boditše se e bego e le phošo ka wena? Go lokile. O na le letadi la bjang, o na le sehloga, o swanetše go dirwa karo bakeng sa sona. Ga o tšwe nageng ye, o tšwa go ye—o tšwa go naga ye, eupša o tšwa Flagstaff. O na le mošemane godimo kua, ga se a phološwa, gomme o a babja, yeo ke nnete. Leina la gago ke Mdi. Earl. Eya morago gae gomme o fole, Leineng la Jesu Kriste.

195 A o dumela ka pelo ya gago yohle? Ke ba bakae ka fa . . . ?

196 A re emeng ka maoto a rena. Oo, nna! Ke eng bontši A kago go se dira? A le a Mo rata? Phagamišetšang diatla tša lena go Yena. “Ke—ke tla Mo tumiša. Ke tla Mo tumiša.” Mo feng tumišo . . . ? . . . malwetši a fodile.

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga mohlare wa Khalibari.

197 Ke nyaka go go botša, mogwera wa ka, ge karolo yela ya Lentšu la Modimo e le nnete, ka moka ga Lona ke nnete. Ke badumedi ba bakae ba lego ka fa? Ke ba bakae ba nyakago Moya wo Mokgethwa ka fa? Šikinya seatla sa gago. Ke ba bakae ba nyakago phodišo ya mmele wa gago? Phagamiša seatla sa gago. Go lokile. Ke ya go le tsopolela Lengwalo la Gagwe.

198 Ga ke fete lena, ke yo monnyane kudu go le feta. Bontši bja lena le bile le Moya wo Mokgethwa pele ke belegwa.

199 Theetšang, Jesu o e boletše ka dipounama tša Gagwe Mong: “Eyang morago mathomong. Maswao a a tla latela bona ba ba dumelago: Ge ba bea diatla tša bona godimo ga balwetši, ba tla welwa ke maruru.”

200 Ba beane diatla go bona seng go amogela Moya wo Mokgethwa. Bjale retologela thwi go dikologa go yo mongwe gomme o bee diatla tša gago godimo ga bona, gomme a re rapeleng mmogo, gomme re dumele gore Modimo o ya go tšhollela ntle kolobetšo ya Moya wo Mokgethwa, O ya go fodiša balwetši bohle le batlaišwa, O ya go ikhweletša letago go Yenamong. Yeo ke yona. Itlemolle wenamong. Diabolo o fentšwe.



60-0306 Go Be Go Se Bjalo Go Tloga Mathomong
Madison Square Garden
Phoenix, Arizona U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org